

## 教室裡的熱天

陳惠珠

聽老師講教育部為著欲予學生因仔佇學校有閣較四序的學習環境，教室欲安冷氣，這個逐班攏有冷氣的好消息予阮心內足歡喜的。

「敢有影？後擺熱人有冷氣通吹矣！」「誠實的喔？佇教室嘛有冷氣通吹！」逐个人攏毋敢相信這是正經的，嘛足期待彼工較緊到咧。

下學期開學了後，冷氣已經安起去矣，看著咧欲有冷氣通吹，阮逐个攏喙笑目笑。無偌久，教室的冷氣欲試看有啥物問題無，老師交代阮愛會記得加紮一領外套來學校，若準講傷冷著愛疊外套才袂去寒著。雖罔冷氣無問題，毋過著等天氣變熱才會用得使用。

清明連假天氣有加較燒熱，不而過教室冷氣使用規則有講，佇高溫的月份，室內的溫度超過二十八度才會使得開冷氣。

六月天火燒埔，真正會熱死人！教室裡有夠鬱熱，學校規定分樓層開冷氣，避免全校全一个時間啟動冷氣電力，致使超出契約容量。諄！這阮毋知啦！教室內底活欲熱死，人感覺誠齷齪，阮干焦想欲較緊吹著冷氣。上早是五樓九點會當開冷氣，繼落來是四樓九點十分，才閣輪著阮三樓。時間欲到矣！老師早就共冷氣卡佮遙控器攢好勢，九點二

十一下到，嚟、嚟兩聲若親像佇咧共阮喝講：「緊共我開開！」緊！緊！緊！阮三步做一伐，毋免老師吩咐，逐个跤手攏誠猛掠，隨倚起來關頭前門、後壁門、窗仔門，老師緊擲遙控器共冷氣開開。無一觸仔久那來那涼，袂閣再頭昏昏腦鈍鈍，規个人精神攏好起來，逐个攏歡頭喜面開始認真上課囉！

猶毋過有當時仔阮老師踎教室煞袂得吹冷氣，啊都冷氣卡獨獨一張爾爾，便若阮去別間教室上課，就會共冷氣卡紮去，老師毋才無冷氣通吹。老師有夠可憐，佇遐爾仔熱的教室內面改簿仔，定定看伊改甲大粒汗細粒汗，三不五時提手巾仔咧拭汗。見擺阮欲排隊去別的所在上課，老師攏會向望阮下課愛較緊轉來咧。老師，阮知影啦！下課阮會緊轉來教室，共冷氣卡交予你，予你會得佮阮做伙吹冷氣吹甲涼涼涼。